



ANTONIO POIAN (1912 - 1987)

Il "Nini da Walle", prin Sindic dal dopovuera

Timp indaûr il gjeometra dal paîs, chel ch'al tirava lis liniis dai confins, al era riverfît da int tant che il dotôr, il predi e il sindic. Chist, però nol è stât il motîf ch'al à sburtât il grup dai "Scussons" a dedicâ la paggina dal "Lunari pal 2010" al complanzût gjeometra Antonio Poian, plui cognussût a Romans come il "Nini da Walle", par via di sô mari Valburga Marangon, che par tancj ains e à gjestît la tratoria "Al Giardinetto". Il vêr motîf si lu capîs leint chista sô curta biografia.

Cui isal il "Nini"?

Antonio Poian, plui cognussût come "Il Nini da Walle", al è nassût a Romans ai cinc di dicembar dal 1912, dal matrimoni tra Anna Valburga, "Walli" Marangon, di Capriva e Beniamino Poian di Romans.

Intal 1940 al à sposât Clara Biancarosa e di jê al à vût doi fioi, Lorenzo e Paolo. Restât vuarfin insiemi cun sô sôr Amalia intal setembar dal 1914, cuant che so pari Benjamin al è muart sul front serp bataiant cun aduès la montura austro-ungarica, il Nini al à vivût par tancj ains cu la sô adorada mama Valburga, che dal 1910 al 1953 e à gjestît in paîs la storica tratoria "Al Giardinetto".

Il "Nini" al à otignût intal 1932 il diploma di gjeometra al istitût tecnic di Udin, cuant che al è stât clamât sot lis armis al à frecuentât la scuola uficiâl di Pavia e dopo al è stât assegnât al Cuarp dai specialiscj costruzion e manutenzion puints cul grât di tenent e funzion di gjeometra.

A la fin dal servizi militâr al è stât congjedât cu la destinazion di riclam inta artiliaria di mont, il so tant amât Cuarp dai

alpîns, e dopo da vuera la sô vita e je stada contrassegnada di un disinteressât, profont e no indiferent impegn public e politic a favôr dal so cjâr paîs.

Tal setembar dal 1945, di fat, Poian al è stât nomenât dal Guvier militâr aleât (A.M.G), in acuardi cul Comitât di liberazion nazionâl (C.L.N.), "president dai paîs di Romans e Vilès", che alora a formavin il Comun aministratîf di Romans, deventant, in pocjîs peraulis, il prin sindic dal dopovuera.

Funzion, chista, che Poian al à mantignût par trê ains e mieç, fin tal fevrâr dal 1948, cuant ch'e je stada proclamada la Republica taliana.

Trê ains e mieç, ricognussûts, storicamentri e umanamentri di dutis lis parts politichis, come i ains plui dificii e confutâts da storia republicana dal dopovuera e come tâi, senza ombra di dubi, come i mancûl desiderabii par una aministrazion comunâl.

Ains dûrs, di fuartis e violentis tensions politichis nazionâls e internazionâls, dominâts dai contrascj sociâi, dai desideris di justizia pas curtis e ricercja di svin-dics personâi. Ains caracterizâts di fuartis ideologjiiis, miseria e paura. Si che duncja, in chel clima, l'operât dal so difìcil mandât al è stât partât a compiment dal "Nini" cun imparzialitât, justizia e onestât, ricognossuda di dutis lis componentis politichis, favorint, cun chel so compuartament, la distension, tant necessaria par ogni civîl convivença e util progrès, cul fin di podê fâ nassi una vera democrazia.

A la fin del so mandât, coincidût cu lis primis consultazions elettorâls democratichis dal dopovuera, Poian al à consegnât la aministrazion comunâl intas mans dal prin sindic uficiâl da storia republicana dal comun di Romans e Vilès, vâl a dî Agnul Montanari.

Dopo vê esercitât chê carica, Poian al è stât nomenât assessôr provinciâl ai lavôrs publics inta gnova a pena costituita aministrazion provinciâl di Guriza e dopo, par diviars ains, ancja conseîr comunâl a Romans. A la fin dai ains Cincuenta al à lassât la sena politica par dedicâsi completamentri a la sô profession e a la sô famea. Il so ultin impegn public al quarta la data dal 1980, cuant ch'al è stât nomenât president da locâl sezion dai alpîns, assum mantignût par cuatri ains. Concludint o podin ben dî che pa sô competença e semplicitât, pa sô proverbial serenitât, onestât e imparzialitât, che vuê si podarès definî "bipartisan", e pa sô naturâl predisposizion di cûr a sfantâ cualsisei contrast tra amîs, clients e personis comunis, pa sô figura imponenta e severa, di granatîr, il Nini al è stât una persona cognussuda, stimada, rispîetada pardut e di ducj e ancjamò vuê ricuardada a larc e vulintîr.

Edo Calligaris